

Biblioteka Univerziteta u Tuzli

Library University of Tuzla

Senad Čeliković

Biblioteka Univerziteta u Tuzli
Tuzla, Bosna i Hercegovina
senad.celikovic@untz.ba

Sažetak

Zadatak Univerzitetske biblioteke Univerziteta u Tuzli je da potpomaže i unapređuje nastavno-naučni i naučno-istraživački rad na Univerzitetu. Prioritetni cilj Univerzitetske biblioteke u budućnosti je formiranje jedinstvene baze podataka o bibliotečkoj građi. Radi ostvarenja tog cilja Univerzitet u Tuzli se priključio bibliografsko-informacionom sistemu COBISS (Kooperativni online bibliografski sistem i servisi). Univerzitet je pojačao i nabavku novih knjiga, a za svoje korisnike je omogućio i pristup EBSCO bazama podataka kao i nekim online servisima koji dozvoljavaju neograničen pristup svojim podacima. Prikupljanje, obrada, čuvanje i davanje na korištenje raznih vrsta bibliotečke građe, uključujući i magistarske radove i doktorske disertacije odbrane na Univerzitetu – kao vid naučno-istraživačkog rada, dio su svakodnevnih bibliotečkih poslova koji se realizuju na odjeljenjima Univerzitetske biblioteke, pored rada sa korisnicima i drugih aktivnosti kojima ova biblioteka učestvuje u održavanju i unapređivanju nastavno-naučnog procesa na Univerzitetu. Jedna od vrlo važnih misija sa kojom se započelo jeste i formiranje jedinstvenog univerzitetskog repozitorija. Budući da predstavlja integralni dio Univerziteta u Tuzli, Univerzitetska biblioteka svojim radom i djelovanjem direktno utječe na kvalitet nastavnog procesa i naučnoistraživačke djelatnosti na Univerzitetu.

Ključne riječi: Biblioteka Univerziteta u Tuzli, COBISS, korištenje usluga biblioteke

Abstract

Duties of University of Tuzla Library means the support and improvement educational and researching at University. Priority of University Library in the future is making a unique data base about library material. Because of that, University of Tuzla joined COBISS (Cooperative Online Bibliographic System and Services). University acquainted more new books and it allowed access EBSCO data base for its users as for some online services which allowed unrestricted access its data base. Acquisition, processing cycle, preservation of library materials and

lending different types of library materials including master's thesis and doctoral dissertations earned at University – it's a part of researching as well as everyday's library duties which are being realised in Library departments, besides users services and the other activities of this Library – in this way, Library maintenances and improves educational process of University. It's very important thing making unique University repository. University library is an integral part of University of Tuzla and improves grade of library service criteria within education process and research at University.

Key words: Library University of Tuzla, COBISS, using library services

Tuzla kroz povijest

Grad Tuzla, sjedište Univerziteta i žarište razvoja cijele regije sjevero-istočne Bosne, treći je po veličini grad u Bosni i Hercegovini. Nastala na prirodnim nalazištima soli (po čemu je i dobila ime), smještena u srcu bogatog prirodnog revira uglja, Tuzla je bila i ostala mnogobrojnim i čvstnim nitima vezana za ove resurse. I danas ti resursi (i privreda bazirana na njima) predstavljaju privredni simbol Tuzle i najužeg područja oko nje – tuzlanskog industrijskog bazena. Tuzla je kroz prošlost bila poprište burnih historijskih događaja koji su potresali ovo područje – od čuvene Husinske bune 1920. godine u kojoj je stradalo mnogo nedužnih rudara, preko svečanih oktobarskih trenutaka oslobođenja od fašizma 1943., do tužnih događaja agresije na Bosnu i Hercegovinu 1992. do 1995. godine i stradanja tuzlanske mladosti 25. maja 1995. godine na čuvenom okupljalištu mladih – Kapiji.

Obrazovanje u Tuzlanskom kraju

Tuzla nije samo snažan industrijski i uopće privredni centar. Tuzla je bila i ostala i jak obrazovni i kulturni centar ovog kraja. Prvi oblici obrazovanja na ovom području javili su se još u srednjem vijeku. U pisanim dokumentima se spominje da je u ovom kraju još u XVI vijeku djelovao Turali-begov mekteb, kao početna muslimanska škola. O radu pravoslavnih osnovnih škola nema podataka do XIX vijeka, ali se među 56 najstarijih pravoslavnih osnovnih škola za koje se zna da su u Bosni i Hercegovini djelovale pred kraj osmanske vladavine, ubrajaju i dvije iz ovih krajeva – osnovne škole u Brčkom i Obudovcu. Rasadnike pismenosti među hrvatskim življem ovoga kraja već od 1655. godine predstavljaju samostanske

škole koje rade u Tuzli i Modriči. Najstarija biblioteka za koju se zna da je postojala u tuzlanskom kraju jeste Biblioteka hadži Halil-efendije u Gračanici osnovana 1763. godine. Prva samostalna biblioteka u Bosni i Hercegovini, nakon sarajevskih biblioteka Gazi Husrev-begove, Osman-Šehdijine i Kantamir-Zadeove, jeste Biblioteka Fadil-paše Šerifovića, osnovana u Gradačcu 1857. godine. Tu su zatim i biblioteke medresa koje su svojevremeno djelovale na ovom području – Behram-begova medresa, najstarija srednja škola u ovom kraju (koja djeluje i danas), te Murat-kapetana i Muradija medresa u Gradačcu, kao i Osman-kapetanova medresa u Gračanici.

Prvo pozorište u Bosni i Hercegovini osnovano je u Tuzli 1898. godine, koje uspješno djeluje i danas. Historijski Arhiv i Muzej sjeveroistočne Bosne, sa bogatim zbirkama, predstavljaju veoma važne institucije za proučavanje i istraživanje prošlosti ovog kraja. Općem obrazovanju, informisanju i zadovoljavanju kulturnih potreba stanovništva u velikoj mjeri je doprinosila i Narodna biblioteka Tuzla, osnovana 1946. godine. Ova biblioteka je od početka svoga rada bila glavni nosioci razvoja bibliotečke djelatnosti na tuzlanskom području.

Mnoge srednje škole u Tuzli imaju veoma dugu tradiciju, a među njima se naročito ističe Gimnazija sa historijom dužom od jednog vijeka.

Univerzitet u Tuzli

Preteča osnivanju Tuzlanskog univerziteta bila je Viša rudarska škola, formirana u Tuzli 1958. godine na zahtjev rudnika. Ova škola će već 1960. godine prerasti u Rudarski, a kasnije u Rudarsko-geološki fakultet. Iste godine u Tuzli je otvorena Viša pedagoška škola, kasnije Pedagoška akademija, a 1961. u Brčkom je na osnovama osam decenija duge tradicije ekonomskog obrazovanja u ovom gradu, osnovana Viša ekonomsko-komercijalna škola, koja će nakon petnaestogodišnjeg rada prerasti u Ekonomski fakultet. U sljedećih deset godina Viša ekonomsko-komercijalna škola otvara odjeljenje za redovni studij u Tuzli, čime je studij ekonomije učinila dostupnijim velikom broju završenih srednjoškolaca iz Tuzle i općina iz njene neposredne blizine. Nakon što se pokazalo da je za razvoj visokog školstva na tuzlanskom području nužno mnogo više saradnje i međusobnog povezivanja ovih institucija kako bi kadrovski i drugi potencijali bili racionalnije iskorišteni, u januaru 1972. godine osnovana je Zajednica visokoškolskih i naučnoistraživačkih ustanova u Tuzli, u koju se udružuju : Tehnološki fakultet u Tuzli, Viša ekonomsko-komercijalna škola u Brčkom i Savezni centar za obrazovanje i zaštitu u industriji i rudarstvu u Tuzli. Radi efikasnijeg stvaranja uslova za razvoj visokog obrazovanja i nauke, neposredno nakon formiranja Zajednice, formiran je Konzorcij za razvoj višeg i

visokog obrazovanja i naučnoistraživačkoga rada u Tuzli. Konzorciju su pristupile najveće privredne organizacije sa područja Tuzle, koje su pomažući materijalno programe koje je donio Konzorcij, značajno doprinijele realizaciji programa visokog obrazovanja na području Tuzle. Na ovaj način visoko obrazovanje ovog regiona je za samo nekoliko godina bilo znatno obogaćeno. U ovom periodu je Odjeljenje Elektrotehničkog fakulteta iz Sarajeva preraslo u Osnovnu organizaciju udruženog rada Elektrotehnički fakultet u Tuzli, koji je nastavio djelovanje u okviru Radne organizacije Elektrotehnički fakultet Sarajevo. Na Rudarskom fakultetu u Tuzli formiran je Odsjek primijenjene geologije, pa je taj Fakultet prerastao u Rudarsko-geološki fakultet. Na Tehnološkom fakultetu otvoren je Odsjek zaštite na radu i životne okoline. Neposredno pred osnivanje Univerziteta u Tuzli, formiran je Medicinski fakultet, a u Brčkom je Viša ekonomsko-komercijalna škola prerasla u Ekonomski fakultet.

Nakon što su ostvareni svi potrebni preduslovi, u novembru 1976. godine zaključen je Samoupravni sporazum o udruživanju visokoškolskih i naučnoistraživačkih organizacija u Univerzitet u Tuzli. Samoupravni sporazum zaključile su sljedeće organizacije udruženog rada: Tehnološki fakultet u Tuzli, Rudarsko-geološki fakultet u Tuzli, Pedagoška akademija u Tuzli, Ekonomski fakultet u Brčkom, Elektrotehnički fakultet – Osnovna organizacija udruženog rada u Tuzli, Medicinski fakultet u Tuzli, Institut za rudarska i hemijsko-tehnološka istraživanja. Od tih prvih koraka dosada izgrađene su hiljade kvadratnih metara laboratorijskog i nastavnog prostora, otvoreni studentski domovi, sakupljeno na hiljade bibliotečkih jedinica, nabavljena savremena oprema, a osposobljava se i Kampus Univerziteta. Od osamdesetih godina XX stoljeća došlo je do snažne ekspanzije Univerziteta, do osnivanja brojnih fakulteta i studijskih odsjeka. Od 2000. godine Univerzitet u Tuzli postaje lider u implementaciji bolonjskog procesa i prvi integrirani univerzitet na prostoru Bosne i Hercegovine. Po svojim ukupnim kapacitetima (materijalno-tehničkim, kadrovskim i svim ostalim) Univerzitet u Tuzli je poslije Univerziteta u Sarajevu najveći bh univerzitet. Danas u sastavu Univerziteta u Tuzli djeluje 12 fakulteta i Akademija dramskih umjetnosti koji imaju svoje organe i podorganizacione jedinice : dekane, prodekane, naučno-nastavna/umjetničko-nastavna vijeća, studijske odsjeke i voditelje odsjeka. Kao podorganizacione jedinice na pojedinim fakultetima egzistiraju biblioteke.

Univerzitetska biblioteka Univerziteta u Tuzli

Univerzitetska biblioteka Univerziteta u Tuzli osnovana je 1986. godine. Njen primarni zadatak je bio da pospješi funkcionalno povezivanje fakultetskih

biblioteka i dokumentacionih centara u jedinstven bibliotečko-informacioni sistem Univerziteta. Krajem osamdesetih godina Univerzitetska biblioteka uključena je u proces izgradnje šireg bibliotečko-informacionog sistema. Biblioteka je u to vrijeme uspješno pomagala razvoj nastavnog procesa i naučnoistraživačkog rada na Univerzitetu. Na početku agresije na BiH, sa ciljem racionalizacije rada i organizacionog prilagođavanja ratnim okolnostima, Ratno predsjedništvo općine Tuzla donosi odluku o prisajedinjenju Biblioteke Univerziteta sa Narodnom bibliotekom, koja od tada postaje Narodna i univerzitetska biblioteka „Derviš Sušić“ - Tuzla. Tako od tog perioda u formalno-organizacionom pogledu biblioteka Univerziteta radi nezavisno od Univerziteta u Tuzli, a nekadašnje fakultetske biblioteke su nastavile samostalan rad na pojedinim fakultetima. Vremenom je Univerzitet prevazišao potrebu za malim fakultetskim bibliotekama, ušlo se u projekat osnivanja Univerzitetske biblioteke koja se sastoji od dislociranih odjeljenja na pojedinim fakultetima. Zadaća Univerzitetske biblioteke je da potpomaže i unapređuje nastavno-naučni i naučno-istraživački rad na Univerzitetu. Pored tekućih bibliotečkih poslova, prioritetni cilj Univerzitetske biblioteke u budućnosti je formiranje jedinstvene baze podataka o bibliotečkoj građi. Radi ostvarenja tog cilja Univerzitet u Tuzli se priključio bibliografsko-informacionom sistemu COBISS (Koooperativni online bibliografski sistem i servisi), jedinstvenom bibliotečko-bibliografskom sistemu koji povezuje u jedan sistem veliki broj biblioteka iz zemalja regiona. Univerzitet je pojačao i nabavku novih knjiga, a za svoje korisnike je omogućio i pristup EBSCO bazama podataka i još nekim online servisima koji dozvoljavaju neograničen pristup svojim podacima. Prikupljanje, obrada, čuvanje i davanje na korištenje raznih vrsta bibliotečke građe, uključujući i magistarske radove i doktorske disertacije odbranjene na Univerzitetu – kao vid naučno-istraživačkog rada, dio su svakodnevnih bibliotečkih poslova koji se realizuju na odjeljenjima Univerzitetske biblioteke, pored rada sa korisnicima i drugih aktivnost kojima ova biblioteka učestvuje u održavanju i unapređivanju nastavno-naučnog procesa na Univerzitetu. Jedna od vrlo važnih misija sa kojom se započelo jeste i formiranje jedinstvenog univerzitetskog repozitorija. U realizovanju svojih zadataka Biblioteka aktivno sarađuje sa centrima i uredima koji djeluju pri Univerzitetu u Tuzli (Centar za izdavačku djelatnost, Ured za naučnoistraživački rad, Ured za međuuniverzitetsku saradnju). Kao integralni dio Univerziteta u Tuzli, Univerzitetska biblioteka svojim radom i djelovanjem direktno utječe na kvalitet nastavnog procesa i naučnoistraživačke djelatnosti na Univerzitetu.

Univerzitetsku biblioteku Univerziteta u Tuzli čini 6 odjeljenja biblioteka sa čitaonicama :

- Odjeljenje Filozofskog fakulteta, Fakulteta za tjelesni odgoj i sport i Akademije dramskih umjetnosti
- Odjeljenje Tehnološkog, Mašinskog i Rudarsko-geološko-građevinskog fakulteta
- Odjeljenje Medicinskog, Farmaceutskog, Edukaciono-rehabilitacijskog fakulteta i Visoke zdravstvene škole
- Odjeljenje na Prirodno-matematičkom fakultetu i
- Odjeljenje Ekonomskog i Pravnog fakulteta

Odjeljenje Univerzitetske biblioteke Filozofskog fakulteta, Fakulteta za tjelesni odgoj i sport i Akademije dramskih umjetnosti

Ovo Odjeljenje Univerzitetske biblioteke smješteno je na Filozofskom fakultetu i raspolaže sa najvećim brojem bibliotečkih jedinica od svih drugih odjeljenja Univerzitetske biblioteke. Broj bibliotečkih jedinica na ovom odjeljenju je 38.804 jedinice građe, od toga je 38.565 knjiga i časopisa, 185 magistarskih radova i 54 doktorske disertacije. Odjeljenje vodi jedan stalno zaposleni bibliotekar sa visokom stručnom spremom (magistar nauka), položenim stručnim bibliotečkim ispitom i licencom za rad u COBISS-u (inače je i koordinator za COBISS ispred Univerzitetske biblioteke Univerziteta u Tuzli). Ovo Odjeljenje posjeduje abecedne kataloge za Odsjeke bosanskog/hrvatskog/srpskog jezika, žurnalistike i historije, kao i katalog serijskih publikacija. Biblioteka se sastoji od čitaoničkog prostora, pozajmnog odjela i odvojenog magacinskog prostora. U biblioteci se nalaze sljedeći naslovi časopisa: „Arhivska praksa“, „Arhe“, „Beharistan“, „Biljeg Srebrenika“, „Bosanski jezik“, „Diwan“, „Gračanički glasnik“, „Historijska traganja“, „Jezikoslovlje“, „Ostrvo“, „Pregled“, „Razlika/Difference“, „Sarajevske sveske“, „Saznanja“, „Socijaldemokrat“, „Sociologija sela“, „Stav“ i „Znakovi vremena“.

Odjeljenje Univerzitetske biblioteke Tehnološkog, Mašinskog i Rudarsko-geološko-građevinskog fakulteta

Odjeljenje Tehnološkog, Mašinskog i Rudarsko-geološko-građevinskog fakulteta jedno je od najstarijih bibliotečkih odjeljenja na Univerzitetu u Tuzli. Raspolaže sa 10.171 jedinicom bibliotečke građe¹. Od toga su 9.892 knjige, 163 magistarska rada i 116 doktorskih disertacija. Biblioteka se sastoji od čitaoničkog prostora, pozajmnog odjela i odvojenog maga-

¹ Podaci koji su navedeni odnose se na početak akademske 2011/2012. godine, a urađeni su na osnovu Izvještaja Centra za osiguranje kvaliteta i internu evaluaciju Univerziteta u Tuzli od 19. 09. 2011. godine

cinskog prostora. Ovo Odjeljenje Univerzitetske biblioteke raspolaže i sa velikim brojem naučnih časopisa od kojih su posebno značajni sljedeći naslovi: “Computers & Chemical Engineering” i “Applied Thermal Engineering”, “Technologica Acta” (naučno-stručni časopis za hemiju i tehnologiju Tehnološkog fakulteta Univerziteta u Tuzli), “Kemija u industriji” (časopis kemičara i kemijskih inženjera Hrvatske), “Croatian Journal of Food Science and Technology” (znanstveno-stručni časopis Prehrambeno-tehnološkog fakulteta u Osijeku), “Glasnik hemičara, tehnologa i ekologa Republike Srpske” (Tehnološki fakultet Univerziteta u Banja Luci), “Acta Periodica Technologica” (zbornik radova Tehnološkog fakulteta u Novom Sadu), “Applied Thermal Engineering : Design. Processes. Equipment”. “Economics”, “Journal - Die Zeitung der Universität Zürich” i “Danube watch - The magazine of the Danube river”. Odjeljenje Univerzitetske biblioteke Tehnološkog, Mašinskog i Rudarsko-geološko-građevinskog fakulteta smješteno je na Tehnološkom fakultetu. Odjeljenje ima jednog stalno zaposlenog bibliotekara, sa visokom stručnom spremom, položenim stručnim bibliotečkim ispitom i licencom za rad u COBISS-u.

Odjeljenje Univerzitetske biblioteke Medicinskog, Farmaceutskog, Edukacijsko-rehabilitacijskog fakulteta i Visoke zdravstvene škole

Ovo Odjeljenje raspolaže sa 3.604 bibliotečke jedinice, od toga je 2.399 knjiga i časopisa, 711 magistarskih radova i 494 doktorskih disertacija. U sastavu Biblioteke je čitaonica sa računarima putem kojih studenti imaju mogućnost da pretražuju internet i koriste dostupne baze podataka, te pozajmni odjel i odvojeni magacinski prostor.

Odjeljenje Univerzitetske biblioteke na Prirodno-matematičkom fakultetu

Studijske grupe prirodnih nauka i matematike osnovane su prvobitno na Filozofskom fakultetu u Tuzli 1993. godine, a 2002. godine ovi odsjeci su izdvojeni iz Filozofskog fakulteta u zaseban, Prirodno-matematički fakultet.² Od tog vremena razvija se na ovom Fakultetu i bogata bibliotečka djelatnost koja prati nastavne procese. U trenutku ovog istraživanja ovo Odjeljenje Univerzitetske biblioteke posjeduje 3.190 bibliotečkih jedinica, od toga 3.060 knjiga i periodičnih publikacija, 90 magistarskih radova i 40 doktorskih disertacija. Biblioteka se sastoji od čitaoničkog prostora, pozajmnog odjela i odvojenog magacinskog prostora.

² Zakon o izmjenama i dopunama Zakona o Univerzitetu u Tuzli, koji je donijela Skupština Tuzlanskog kantona. // Službene novine Tuzlanskog kantona, br. 2 (2002).

Odjeljenje Univerzitetske biblioteke Ekonomskog i Pravnog fakulteta

Odjeljenje Univerzitetske biblioteke na Ekonomskom fakultetu je najmlađe odjeljenje Univerzitetske biblioteke. Počelo je sa radom 30. 08. 2010. godine. Do ovog datuma na Fakultetu nije postojala biblioteka u pravom smislu te riječi. Postojala je prostorija koja je služila kao neka vrsta čitaonice, ali u njoj je bio samo manji broj starih knjiga na stranim jezicima koje skoro niko nije koristio. Zahvaljujući velikom entuzijazmu zaposlenih i nesebičnoj pomoći Univerziteta, prikupljen je značajan broj knjiga i Biblioteka je, u akademskoj 2010/2011. godini, posjedovala oko 1.500 knjiga i periodičnih publikacija, a njen fond se i dalje kontinuirano bogati novom neophodnom naučnom, univerzitetskom i stručnom literaturom iz oblasti ekonomskih nauka. Više od 90% naslova koje Biblioteka posjeduje su knjige koje su izašle u posljednjih desetak godina. Biblioteka ima pristup internetu sa 5 kompjutera i čitaonički prostor sa 20 čitaćkih mjesta. Ovo Odjeljenje Biblioteke ima jednog stalno zaposlenog bibliotečkog radnika, sa visokom stručnom spremom, položenim stručnim ispitom iz bibliotekarstva i licencom za rad u COBISS-u.

Odjeljenje Univerzitetske biblioteke na Ekonomskom fakultetu raspolaže sa sljedećim naslovima serijskih publikacija : “Ekonomska revija” (Ekonomski fakultet Univerziteta u Tuzli), “Tranzicija” (Ekonomski institut u Tuzli), “Poslovna izvrsnost” (Sveučilište u Zagrebu), “Ekonomski vjesnik” (Ekonomski fakultet u Osijeku), “Anali poslovne ekonomije” (Univerzitet za poslovni inženjering i menadžment u Banja Luci), “Acta Economica” (Ekonomski fakultet Univerziteta u Banja Luci) i “Ekonomski forum” (Ekonomski fakultet Univerziteta u Zenici).

Umjesto zaključka

2011. godine Biblioteka Univerziteta u Tuzli je postala članica sistema COBISS.BH (Koooperativni online bibliografski sistem i servisi) u koji je dosada uključeno 50 biblioteka u našoj zemlji. Zaposleni u ovoj Biblioteci su dosada pohađali kurs Korištenje programske opreme COBISS2/Katalogizacija – početni nivo i dobili licence za uzajamnu katalogizaciju, a u planu je i korištenje programske opreme COBISS3. Zadatak koji se nalazi pred zaposlenima u ovoj Biblioteci je unošenje cjelokupne građe Univerzitetske biblioteke u COBISS.BH.

Korisnici Univerzitetske biblioteke imaju pristup EBSCO bazama podataka kao i nekim online servisima putem kojih mogu pregledati i preuzimati tekstove brojnih stranih i domaćih naučnih časopisa, od kojih su mnogi dostupni u full-formatu. Zadatak bi-

bibliotečkih djelatnika Odjeljenja Univerzitetske biblioteke Univerziteta u Tuzli je da prikupljaju, stručno obrađuju i daju na korištenje monografske i serijske publikacije iz naučnih oblasti koje „pokrivaju“, te da prikupljaju, čuvaju i daju na korištenje doktorske disertacije i magistarske radove odbranjene na Univerzitetu, kao i diplomske radove studenata. Korisnici Biblioteke su studenti svih fakulteta Univerziteta u Tuzli, nastavno osoblje i drugi naučni i stručni radnici. Korisnicima je omogućen pristup sljedećoj građi:

* udžbenicima i stručnoj literaturi

* časopisima i

* arhivskoj zbirci sa hiljadama diplomskih i magistarskih radova te doktorskih disertacija.

Na svakom odjeljenju Univerzitetske biblioteke vodi se zasebna baza o korisnicima Biblioteke. Članstvo u Biblioteci prestaje gubitkom statusa studenta, odnosno gubitkom statusa uposlenika na Univerzitetu. U toku 2011/2012. akademske godine, a povodom 35 godina rada Univerziteta u Tuzli, zaposlenici Univerzitetske biblioteke su pripremili i izradili Bibliografiju doktorskih disertacija kojom su obuhvaćene sve doktorske disertacije odbranjene na Tuzlanskom univerzitetu (od prve disertacije odbranjene na Tehnološkom fakultetu, 1962. godine). 2011. godine na Senatu Univerziteta donesen je i jedinstven Pravilnik o radu sa korisnicima Univerzitetske biblioteke koji se primjenjuje u svim odjeljenjima. Pravilnikom je između ostalog regulisano da korisnik jednog odjeljenja Univerzitetske biblioteke ima pravo koristiti usluge svih odjeljenja Univerzitetske biblioteke. Sva odjeljenja Univerzitetske biblioteke otvorena su svakog radnog dana od 8:00 do 16:00. Predviđeno je da se određene vrste publikacija (diplomski i magistarski radovi, doktorske disertacije, periodika, stare i rijetke publikacije, rukopisi, unikati, referalna literatura, skupocjena i oštećena građa) mogu koristiti samo u prostorijama biblioteka i čitaonica. Jedan korisnik može podići najviše dvije knjige i to najduže na 7 dana, s tim da se rok može produžiti za još 7 dana, ukoliko građa nije u međuvremenu tražena. Sve usluge Univerzitetske biblioteke koriste se uz indeks, što se u praksi pokazalo izuzetno efikasnim, jer je time skoro potpuno isključena mogućnost nevraćanja odnosno gubljenja bibliotečke građe.

U mjesecu maju 2012. godine Univerzitet u Tuzli je potpisao sporazum o saradnji sa Turskom agencijom za međunarodnu saradnju i koordinaciju (TIKA). Potpisanim protokolom o donaciji vrijednoj 280.000 eura bit će, između ostalog, omogućena i obnova Univerzitetske biblioteke Univerziteta u Tuzli.

Literatura:

Izveštaj Centra za osiguranje kvaliteta i internu evaluaciju Univerziteta u Tuzli” (19. 09. 2011.). Dostupno na: <http://www.tf.untz.ba/biblioteka.htm>

Jovičić, Miladin; Jovičić, Ankica. Visoko obrazovanje u Bosni i Hercegovini. // Međunarodni naučni skup „Ekonomska teorija i praksa u savremenim uslovima“, Brčko 10. novembar 2011. godine / glavni i odgovorni urednik Ljubomir Trifunović. Brčko : Ekonomski fakultet, 2012, str. 171-176.

Pravilnik o radu sa korisnicima usluga Univerzitetske biblioteke (donesen na sjednici Senata Univerziteta u Tuzli 27. 06. 2011.).

Službene novine Tuzlanskog kantona, br. 2 (2002).

Univerzitet u Tuzli : 1976-1986. Tuzla : Univerzitet, 1986., str. 22.

Univerzitet u Tuzli : 35 godina. Tuzla : Univerzitet, 2012, str. 117-118.

Senad Čeliković (Tuzla, 1979.) je voditelj biblioteke u Univerzitetskoj biblioteci Univerziteta u Tuzli, na Odjeljenju Ekonomskog fakulteta od maja 2011. godine. Autor je nekoliko članaka iz oblasti bibliotekarstva i iz nekih drugih oblasti. Diplomirao je bosanski jezik i književnost na Filozofskom fakultetu Univerziteta u Tuzli. Akademske 2008/09. godine upisao se na Postdiplomski studij iz bibliotekarstva na Filozofskom fakultetu Univerziteta u Sarajevu, na kome u vrijeme izlaženja ovog broja "Bosniace" brani svoj magistarski rad. U svijet bibliotekarstva ušao je 2007. godine u JU Javna biblioteka Lukavac. Učestvovao je na više konferencija i seminara iz oblasti bibliotekarstva. Područja njegovog interesovanja su kulturna historija, historija biblioteka, mjesto i uloga biblioteka u 21. stoljeću i dr. Od 1999. godine do danas radi i kao saradnik u JU RTV Lukavac na poslovima novinara-spikera i urednika nekoliko emisija i rubrika.

Senad Čeliković (Tuzla, 1979) is a head of Library of University of Tuzla at the Department of Faculty of Economic Sciences since 2011, May. He is an author of some articles from librarianship and from some other spheres. He graduated Bosnian language and literature at Faculty of Philosophy at University of Tuzla. In 2008/2009 he began to attend Postgraduate studies at Faculty of Philosophy at University of Sarajevo where he would win his master's thesis. He started to work in Public Library Lukavac in 2007. He participated in some conferences and symposiums from librarianship. He is interested in cultural history, history of libraries, Library in 21st century. Since 1999, he has worked as a collaborator at RTV Lukavac as a journalist, speaker and editor of some broadcasts and columnes.